

Na osnovu člana 62. stav (4) Zakona o vodama („Službene novine Federacije BiH“, broj: 70/06) federalni ministar poljoprivrede, vodoprivrede i šumarstva u saglasnosti sa federalnim ministrom okoliša i turizma d o n o s i

**PRAVILNIK
O IZMJENAMA I DOPUNAMA PRAVILNIKA O NAČINU
ODREĐIVANJA EKOLOŠKI PRIHVATLJIVOG PROTOKA**

Član 1.

U Pravilniku o načinu određivanja ekološki prihvatljivog protoka („Službene novine Federacije BiH“ br. 4/13, 56/16 i 62/19) član 5. mijenja se i glasi:

**„Član 5.
Izuzetak u određivanju EPP**

Izuzetno, odredbe ovog pravilnika se ne primjenjuju u slučaju zahvatanja vode za javno vodosnabdijevanje stanovništva vodom za piće kada se ne mogu ispuniti zahtjevi za EPP-om propisani ovim pravilnikom, a uzimajući u obzir prevladavajući javni interes. U tom slučaju, ekološki prihvatljiv protok utvrđuje se na osnovu hidroloških osobina vodnog tijela za karakteristične sezone kao minimalni srednji mjesečni protok 95% od vjerovatnoće pojave."

Član 2.

Član 10. mijenja se i glasi:

**„Član 10.
Hidrološki podaci**

- (1) Za određivanja ekološki prihvatljivog protoka koriste se hidrološki vremenski nizovi na profilu vodozahvata koji predstavljaju prirodni hidrološki režim, sa sljedećim karakteristikama:
 - a) Bez grešaka i nedostajućih podataka;
 - b) Trajanje od najmanje 10 godina (najbolje u kontinuitetu) koristeći sve raspoložive vremenske nizove. Hidrološki vremenski nizovi trebaju predstavljati najnovije vremenske nizove kad za to postoje podaci;
 - c) Vremenski nizovi na bazi srednjih dnevnih protoka.
- (2) U slučaju da podaci za prirodni hidrološki režim na profilu vodozahvata za koji se određuje EPP za odgovarajući vremenski period ne postoje isti se određuje na osnovu hidroloških podataka sa druge vodomjerne stanice za koju postoje hidrološki podaci (u daljnjem tekstu: repna stanica) iz stava (1) ovog člana.

- (3) U slučaju iz stava (2) ovog člana potrebno je uspostaviti korelativnu vezu između protoka na profilu za koji se određuje EPP i protoka na repornoj hidrološkoj stanici izvođenjem osam serija simultanih vodomjerenja pri različitim amplitudama vodostaja uz koeficijent korelacije $k \geq 0,8$.
- (4) Simultana hidrometrijska mjerenja iz stava (3) ovog člana moraju se izvoditi po metodama ISO standarda 748:2007, ISO 1088:2007, ISO 9555-1:1994, ISO 9555-3:1993, ISO 9555-4:1992, ISO/TR 11656:1993 ili ISO/TR 25377:2007 ili po metodama drugog međunarodno priznatog standarda na području hidrometrije.“

Član 3.

U članu 11. iza stava (4) dodaju se novi st. (5) i (6) koji glase:

- „(5) U slučaju da se utvrdi da ne postoji odgovarajuća repna hidrološka stanica ili je koeficijent korelacije $k < 0,8$, te se time ne mogu dobiti odgovarajući hidrološki podaci iz člana 10. ovog Pravilnika za jednadžbe iz st. (2) i (3) ovog člana, EPP će se odrediti na temelju proračuna Q_{SR} po odgovarajućim metodologijama i na osnovu jednadžbe iz stava (4) ovog člana.
- (6) Način proračuna Q_{SR} u navedenom slučaju treba biti po jednoj od navedenih hidroloških metodologija:
- hidrološka regionalizacija $Q_{SR.g}$ (srednji godišnji protok),
 - Langbein metoda i
 - karta specifičnog otjecanja $Q_{SR.g}$ (srednji godišnji protok).“

Dosadašnji stav (5) postaje stav (7).

Član 4.

U članu 13. u tački 6. iza riječi „vrsta“ dodaje se tekst : „Navedeno mišljenje mora biti potvrđeno (verifikovano) od strane Federalnog ministarstva okoliša i turizma do uspostavljanja Federalnog zavoda za zaštitu prirode.“

Iza tačke 6. dodaje se nova tačka 7. koja glasi: „ 7. Program monitoringa EPP-a i“

Dosadašnja tačka 7. postaje tačka 8.

Član 5.

U članu 20. u stavu (1) ispred riječi „Izveštaj “ dodaju se riječi „Pozitivno evaluiran“

Iza stava (1) dodaje se novi stav (2) koji glasi:

„Izveštaj o procjeni EPP-a za aktivnost za koju se traži izdavanje vodnog akta može izrađivati pravna osoba koja za tu aktivnost posjeduje ovlaštenje nadležnog organa za izradu dokumentacije na osnovu koje se izdaju vodni akti.“

Dosadašnji st. (2) i (3) postaju st. (3) i (4).

Član 6.

U članu 22. u stavu (2) iza riječi „sastavni dio“ dodaju se riječi „izvještaja o procjeni EPP-a i“.

Član 7.

U članu 23. iza stava (2) dodaju se novi st. (3) (4) i (5) koji glase:

- „(3) Kontinuirani monitoring EPP-a se treba vršiti instalacijom automatskih hidroloških stanica opremljenih sa senzorima za satnu registraciju nivoa vode i opremom za daljinski prijenos podataka.
- (4) Na vodomjernim profilima iz stava (1) ovog člana potrebno je uspostaviti krive protoka $Q=f(H)$. Krive protoka se računaju na osnovu izvršenih šest hidrometrijskih vodomjerenja pri različitim amplitudama vodostaja na godišnjem nivou i iste treba da predstavljaju realno stanje protoka na profilu.
- (5) Na osnovu formiranih krivih protoka $Q=f(H)$ na predviđenim automatskim hidrološkim stanicama za kontinuirani monitoring EPP-a iz stava (2) ovog člana postaviti virtualne senzore za protok, tako da se na satnom nivou može utvrditi vrijednost protoka na svakoj pojedinoj stanici.“

Dosadašnji stav (3) postaje stav (6).

Član 8.

Član 24. mijenja se i glasi:

„Član 24.

Način izvještavanja o monitoringu EPP

- (1) U cilju izvještavanja o monitoringu EPP-a korisnik objekta je prije izdavanja vodne dozvole dužan osigurati instalaciju hidroloških stanica i izvršiti uvezivanje hidroloških stanica za kontinuirani monitoring EPP-a u informacioni sistem voda nadležne agencije za vode, a nakon dobivanja vodne dozvole osigurati kontinuiran rad hidroloških stanica (uzvodno i nizvodno od lokacije zahvata vode) i redovito ažurirati krive protoka $Q=f(H)$ tako da nadležna agencija za vode u svakom trenutku može imati uvid u satne protoke na navedenim hidrološkim stanicama u stvarnom vremenu.
- (2) U slučaju da podnosilac zahtjeva ne izvrši instalaciju i ne izvrši uvezivanje hidroloških stanica za kontinuirani monitoring EPP-a u informacioni sistem voda nadležne agencije za vode iz stava (1) ovog člana organ nadležan za izdavanje vodne dozvole mu neće istu izdati.
- (3) U slučaju da podnosilac zahtjeva nakon dobivanja vodne dozvole ne osigura kontinuiran rad hidroloških stanica i redovito ažuriranje krive protoka $Q=f(H)$ iz stava (1) ovog člana agencija za vode će o tome obavijestiti organ koji je izdao vodnu dozvolu radi pokretanja postupka njenog oduzimanja.

- (4) U slučaju da na mjestima hidroloških stanica za kontrolu EPP-a nema odgovarajuće mobilne mreže, podaci o kontinuiranom monitoringu EPP-a se trebaju dostavljati nadležnoj agenciji za vode mjesečno, do 10.-og u mjesecu za prethodni mjesec, na odgovarajući način u digitalnom obliku.“

Član 9.

Iza člana 24. dodaju se novi članovi 24a. i 24b. koji glasi:

„Član 24a.

Kontrola monitoringa EPP-a

- (1) Kontrola monitoringa EPP-a obuhvata provjeru redovnog ažuriranja $Q=f(H)$ krive vršenjem kontrolnih vodomjerenja i provjeru ispravnosti kontinuirane registracije vodostaja na uspostavljenim automatskim hidrološkim stanicama i kontinuiranog poštivanja utvrđenog EPP-a.“
- (2) Kontrolu redovnog ažuriranja $Q=f(H)$ krive vršenjem kontrolnih vodomjerenja i provjerom ispravnosti kontinuirane registracije vodostaja na uspostavljenim automatskim hidrološkim stanicama vrše nadležne agencije za vode.
- (3) Kontrolu kontinuiranog poštivanja vodnom dozvolom utvrđenog EPP-a na licu mjesta vrši nadležna vodna inspekcija u saradnji sa nadležnom agencijom za vode.

„Član 24b.

Oduzimanje vodne dozvole

Nepostupanje korisnika objekta u skladu sa uslovima o EPP–u utvrđenim vodnom dozvolom predstavlja bitnu povredu uslova iz vodne dozvole što predstavlja osnov za njeno oduzimanje.

Član 10.

U Prilogu 3. Pravilnika „Sadržaj izvještaja posebne procjene EPP“ u tački 1. UVOD dodaju se nove alineje 5. i 6. koje glase:

„- Procjena EPP u zaštićenim područjima.

- Biološki i ekološki parametri“.

Član 11.

Ranije izdati vodni akti

Usaglašavanje vodnih akata izdatih do dana stupanja na snagu ovog Pravilnika sa odredbama ovog Pravilnika izvršiće se na sljedeći način:

- (1) prethodna vodna saglasnost usaglasiće se sa odredbama ovog Pravilnika pri izdavanju vodne saglasnosti;
- (2) vodna saglasnost usaglasiće se sa odredbama ovoga Pravilnika pri izdavanju vodne dozvole;
- (3) vodna dozvola usaglasiće se sa odredbama ovoga Pravilnika najkasnije pri obnovi iste.“

Član 12.

Ovaj Pravilnik stupa na snagu narednog dana od dana objave u „Službenim novinama Federacije BiH“.

MINISTAR

mr.sci. Šemsudin Dedić

**Broj:
Sarajevo,**